

*Hoe Gheerraert van Viennen veel tenten sach, daer meer dan twintich
duysent Sarazinen binnen saten en aten, ende hoe die verslaghen
worden van hem ende van Galien.*

[37]

[h3ra] Galien reet seer stoutelijcken met Gheerraert ende Aernout van Bellande mit alle die ander vromme campioenen tot dat si seer bi die stadt van Monsureyn quamen, ende in de voerhoede wasser omtrent vier duysent. Ende als si bi Monsureyn begonsten te comen, Gheeraert van Vyennen, die voer alle dander reet, wort siende neven een groote rotce in een scoone groen valleye veel dyversce schoone tenten, daer groote menychte van Sarazinen bynnen waren. Ende dat aen siende sach hy veel Sarazinen gaen in die selve tenten ende uut coemen, van den welcken de somighe dranck droeghen ende die somighe droeghen spise. Als Gheeraert de ghene sach die de spise droeghen, en wist hi wat peysen, seer verwondert sijnde wat volck dat wesen mocht ende waerom si niet ghereyst en waren tot in die stat van Monsureyn om haer maeltijt te houdene. Doen sinde hi een van sijn verspiers tot dier plaetsen om dat hy vernemen soude wat volck dat wesen moechte. Welcke verspieder, als hi [w]ederom quam, hem vertelde dat het volck was van Belligant, den broedere van Marchille, die in Torckijen succours hadden ghehaelt om tot Marchille te bringen, met welck volck waren vyer groote vermairde coninghen, vanden welcken deen generael capiteyn was boven dandre, ende men noemden Mauprijn, coninck van Torckien, een vervaerlic Sarazijn. Deze was broedre van Corsuble, dye Galyen verslaghen hadde, ende een neve vanden coninck Pinaert. Mit Mauprijn waren ter tafelen geseten drie ander heydensche coningen ende meer dan twintich duysent strijt[h3rb]barighe mans. Alle den nacht hadden sy sonder eenich toeven ghereden om te coemen tot den coninck Marchille, dyese hadde doen halen om conynck Kaerlen te bevechten, ende in die scone valley hadden si haer tenten ende pauweloenen gheslaghen om henlieden aldaer int groene te ververscene.

Binnen desen es Galien met zijn heyr comen bi Gheeraert, die tot hem sprack: “Lieve oom, waerom hebdi u volck hier doen houden?”

“Neve, siet ghinder in ghene tenten sijn Sarazinen gheseten ter tafelen,” sprack Gheeraert. “Believet u, wi selense ghaen bevechten ende nemen haer spise.”

“Bi mijnder trouwen, tis mi lief,” sprack Galien.

Doen quam Galien tot de avantgarde, die hy sette in oerdonancyen ende sprack tot Geeraert: “Ghi hebt vijf duysent mans ende Arnout van Bellande vijfduysent.” Tot den welcken Galien sprack: “Ghy sult verborghen bliven opten hoeck van gheen bosch, ende eest datsi daer inne vlieden willen, so seldise keeren!”

Ende Galyen nam met hem thien duysent ma[n]s. Ende mettien datsi van malckanderen sceyden souden, quam een bespieder die tot Galien sprack: “Heere, oerdoneert terstont u volck, want nemmermeer en moechdi beter te pas comen dan nu! De Sarazinen sijn alle onghewapent ter tafelen gheseten.”

Als Galyen des boden woerden verstont, riep hy tot Gheeraert: “Och lieve oom, rijt lichtelijcken met u volck nevens den bosch, ende ick sal rechtvoerts in die tenten rijden! Ende Arnout sal ter ander zi[d]en riden om die passagie te wachten.”

Ghelijck als Galien beval also deden si op dat de Sarazinen niet vlieden en souden binnen dye stat van [h3va] Monsureyn. Doen sloeghen sy haer peerden met sporen, seer raschlijck ridende in die tenten daer de Sarazinen sonder eenich achterdyncken goede chiere maecten, tot die welcke si met luyde stemmen riepen: “Slaet doot, sla doot, dese ongheloovighe honden op dat sijt niet al tsamen alleene en eten!”

Doen mochtmen aenscouwen de Sarazinen doirhouwen, doerkerven ende van die tafelen doot vallen met groote hoopen, so datter daer verslaghen worde vijf oft ses duysent eer iement eenighe were boot.

Maer als coninc Mauprijn sach de grote moert die de Kerstenen onder sijn volck doende waren, liep hi uut sijn tente, hi sloot sinen hellem, sinen voet stelde hy inden steghelreep, op sijn peert sprynghende, [ende] desghelijcke deden dander coningen ende meer dan vijf duysent Sarazinen, die alle bestonden te vliene, meenende hen leven te salveren. Maer Arnout met sijn volck reet hen te ghemoette, die so felliken op hen sloech dat si den doot smaken moesten. Dwelck Mauprijn siende, bestont na den bosch te riden om sijn leven te salveren. Maer Galien die him wel vlieden sach, reet hem na in den

bosch daer hem Galien verslaghen soude hebben, maer Mauprijn badt hem ghenade, segghende, waert datti sijn leven salveerde, t soude hem grootelijcken profyteren.

“Dat en sal ick niet doen,” sprack Galien. “Ick en sal u niet betrouwen, maer ick sal u thoot afslaen!”

“Bi mynen god,” sprack die Sarazijn, “ick ghelove u by mijn trouwe ende bi mijn wet, eest dat ghi mi van der doot spae[r]st, ick sal mi laten dopen ende ghelooven in uwen god Jhesus, ende ick sal u leveren de stat Monsue[h3vb]reyn met dat stercke casteel. Daer binnen es een maecht, ghenoomt Guymande, de alderscoonste die noyt man sach, dochter van Marchille. Daer binnen es oock den schat van Marchille ende van Belligant, sijn broeder.”

Doen Galien hoorde dat hi hem soude laten doopen ende dat hy hem leveren soude Monsureyn ende tcasteel, ontfinck hi des Sarazijns eet ende spairden van die doet. Doen gaf hem Mauprijn sijn sweert ende Galien hinck dat ain sijn zide. Daerna es hy op sijn peert gheseten ende leyde den coninck Mauprin met hem.

Galien es met Mauprijn so langhe ghereden dat hy comen es bi Gheerairt, Aymeri, Bennes ende Arnout van Bellande die verslaghen hadden alle de Sarazinen die meenden te ontvliene. Doen aten ende droncken de Kerstenen alle de spyse ende dranck die de Sarazinen daer bracht hadden.

Ende als sy wel gheten, ghedroncken ende goede chiere ghemaect hadden, dede Galien blasen om te vertrecken. Ende als sy alle tsamen verghadert waren, gheboot Galien ende Arnout dat si reysen soudenden rechten wech na Monsureyn, dat op eensteenrotce stont, dwelck van verre seer schoone was te aensiene. Seer groot verlanghen hadde Galien om te aenscouwen de schoone maecht Guimande, van die welcke Mauprin, de ghevangen heydensche conynck, seer vele ghesproken hadde.